

# Mäherlied

*Mannen uuf, dr Güggele chräiht,  
D' Sägesse sy dänglet!  
Zytig uuf isch halber gmäiht,  
D' Schmale hei si g'stänglet!  
Uuse Mäher! Uuse Chnächt!  
Näht e Schutz und wetzet rächt,  
Stöht i's Mahd und hauet dry,  
Z' Obe muess's am Schärme sy!*



*Mannen uuf, 's isch Wätterluft,  
's Rägeloche isch feister,  
Wenn e Ma dehinde blybt,  
Wird is's Wätter Meister!  
Rühret d' Gable, hindereglitzt!  
Alti Brästen uusegswitzt!  
Ladet uuf und fahret hei,  
Ass mr z' Obe singe cheu!*



*Mannen uuf, 's isch Summerzyt  
Und verby mit Leue,  
Wär nen Arm und Wetzstei het,  
Sell cho hälfe heue!  
Schicket ech vo früeh bis Nacht,  
Danket Gott und gäht mr acht! –  
Isch dr Sägen i dr Schüür, –  
Bhüet is Gott vor Blitz und Füür!*

Josef Reinhart (1875-1957)